

Date – 20/05/2025

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

- Mizoram chu ziaik leh chhiar thiam vekna state-ah puan a ni a, ramchhung chanchina ziaik leh chhiar thiam vek awmna state awmchhun leh a hmasaber a ni.
- Union Minister of State, Skill Development & Entrepreneurship changtu Pu Jayant Chaudhary an hmarchhak bial chu ramchhunga hmeichhiate hmasawn bultanna tur a ni a ti.
- External Affairs Minister Dr.S.Jaishankar chaun vawiin khan Netherlands Prime Minister Dick Schoof a kawm
- India chu mitna chi khat Trachoma umbo tawhna ramah WHO chuan a puang.

<><><>

MIZORAM DECLARED FULLY LITERATE STATE

Mizoram chu ziaik leh chhiar thiam vekna state-ah puan a ni a, ramchhung chanchina ziaik leh chhiar thiam vek awmna state awmchhun leh a hmasaber a ni.

He thu hi Chief Minister Pu Lalduhoman vawiin tlai khan Mizoram University a ah a puang a, Union Minister of State Education Pu Jayant Chaudhary bakah sorkar laipui leh state mipawimawh thahnem tak hmaah a puang a ni.

Chief Minister Pu Lalduhoma chuan ULLAS - Nav Bharat Saksharta Karyakram (NILP) hnuaiah Mizoram chu India chanchina ram puma ziaik leh chhiar thiam vek state hmasa bera puan a ni chu a chhuang hle tih a sawi a. Mizoram kil tin leh chhungkaw tinah te ziaik leh chhiar thiamna bakah zirna leh thiamna kalpui zel turin hma an la dawn a ti. Ziaik leh chhiar thiam lo te chuan hriselna leh khawsakphungah te thutlukna mumal tak siam an harsat a, hei hian retheih lehzualna te a thlen thei a ni a ti a, ziaik leh chhiar thiamna chuan ram inrelbawlna leh khawtlang nun siamthat kawngah te a thawh hlawk hle a, chakna petu pawimawh tak a ni a ti.

Union Minister of State Jayant Chaudhary-a chuan India-in zalenna a chan atanga chhutin Mizoramin ram puma ziaik leh chhiar thiam vekna state hmasa ber

nihna dinhmun a chelh chu hlawhtlinna ropui tak a ni a ti a. Ziak leh chhiar thiam chu Saptawng emaw Hindi emaw thiam tihna nilovin mahni tawnga ziak leh chhiar thiam tihna a ni a, India in ziak leh chhiar thiam (literacy)a hrilh fiah dan chu khawvel pum pawhin a pawmpui tawh a ni a ti.

Union Minister chuan thiamna chu khawvela thil ti thei ber a ni a, Mizoramin vawiina ziak leh chhiar thiam vekna state hmasa ber ni tura a lo beihna leh a paltlang tawh zawng zawng te chu a ropui hle a ni a ti.

Sorkar laipua Ministry of Education hnuaia Understanding Lifelong Learning for All in Society (ULLAS) hnuaia Ziak leh chhiar thiam vekna state ni tur hian state chhung mipui awm zat atanga teha ziak leh chhiar thiam zat chu zaa 95 aia tam nih a ngai a, he tehfung atang hian Mizorama ziak leh chhiar thiam zat chu Periodic Labour Force Survey (PLFS 2023-2024) ah zaa 98.2 a ni ta a. Tun hnaia ULLAS hmalaknaa ziak leh chhiar thiam an lo pun tak avangin ULLAS tehfung atangin Mizoram chu ziak leh chhiar thiam vekna state tia puan theih a lo ni ta a ni.

Ziak leh chhiar thiam vekna state ni tur hian School Education Department-a Samagra Shiksha enkawl, ULLAS hnuaiah Nav Bharat Saksharta Karyakram (New India Literacy programme) tihhlawhtlin hna thawh a ni a. Governing Council leh Executive Committee of State Literacy Mission Authority din a ni a, Mizoram sorkar chuan State Project Office Samagra Shiksha Mizoram chu he Programme tihhlawhtling tura thawktu ah a ruat a ni. State Literacy Mission Authority tanpuitu atan State Centre for Literacy(SCL) din a ni a, SCERT kutah dah a ni.

<><><>

GOVERNOR

Larsap General (Rtd) Vijay Kumar Singh-a'n sawrkarin mitin huapzo zirna a kalpui mek hnuaiah zirna tibahlah thei chi a awm loh na tura hmalak a nih thu sawi.

Mizorama bengngawng leh ri hriatna tha lote tana zirna in awmchhun, Ephatha Special School for the Deaf and Hard of Hearing din champhaphak wawi 9-na a hmanpui na ah he thu hi sawiin Larsap chuan zirtirtute chu classroom-ah thiamna, dawhtheihna leh ngilneihna an lantir bakah naupangte inrintawkna leh hlimna an pe a ti a, an theihna inthup an haichhuah sak thin chu lawmawm atih thu sawiin thawktute leh nu leh pa te inpekna leh rawngbawlna ngaihhlutawm tak chu a chhuang hle tih sawiin, bengngawng leh ri hriatna tha lote puala Mizorama school awmchhun chu Mizoram tana meichher chhawmnungtu leh, hmangaihna leh thawhrimna hmanga hlawhtlinna a hmuh theih a ni tih lantirtu a nih thu a sawi bawk.

Larsap chuan vohbik naupangte enkawl kawngah inchhung khura inenkawlnain awmze thui tak a nei tih sawiin, hmangaihna leh an laka beiseina chuan naupangte chakna pein harsatna paltlangin an duhthusam an thleng thei thin a ni, a ti a. Nu leh pate chu fate hmalam hun atana mi pawimawh bik an nih angin zirna tha an dawn theih nana theihtawp chhuah turin a chah a. Sawrkarin mitin huapzo zirna a kalpui mek hnuaiah zirna tibahlah thei ang chi reng reng a awm loh nana hmalak a nih thu sawiin, hemi kawnga Ephatha Special School for the Deaf and Hard of Hearing hmalakna chu mitin huapzo zirna a taka tichiangtu a ni, a ti.

<><><>

UNION MINISTER

Union Minister of State, Skill Development & Entrepreneurship changtu Pu Jayant Chaudhary an hmarchhak bial chu ramchhunga hmeichhiate hmasawn bultanna tur a ni a ti.

Ministry of Skill Development & Entrepreneurship hmalakna hnuaia Hmarchhak state hrang hranga hmasawnna tura chhawpchhuah Advancing Apprenticeship in the Northeast Region puala Aizawla ATI Auditorium-a hun buatsaih a hmanpui na ah he thu hi sawiin Union Minister chuan India in kum 2047-a ram hmasawn a nih tumna kawng a zawh mekah hmarchhak bial chu hmasawnna tel ve turin theihtawp chhuah an ngai tih a sawi a, vawiina an hmalakna avangin hmarchhak biala thalai tam tak ten hlawkna an hmu thei dawn tih sawiin sawrkar laipui hmalakna tih hlawhtlinna pawimawh tak a ni tih a sawi.

Minister chuan ramchhung hmun kilkhawr tlhenga hmasawnna thleng phak hmalakna neih a pawimawh thu a sawi a, Kutkawih eizawnna chu thalai te leh mipui a tam thei ang berin an chhawr theih nan chhawpchhuah an tum tih sawiin hmeichhe dinhmun chawikan nan nasa taka tan lak ani dawn tih a sawi bawk.

Chief Minister Pu Lalduhoma pawhin thu sawiin Mizo thalaite chu thiamthil an ngah a, hengte hi eizawnna tlaka siam zel a pawimawh a ti a, tun dinhmunah Mizoramah PMKVY hnuaiah mi sang 9 chuang an training tih sawiin kutkawih thiamthil zirna chu District hrang hranga awm turin hma an la a ti a, Kolasib, Champhai, Serchhip ah din tura hmalak ani tih a sawi bawk.

Pu Lalduhoma chuan sawrkar flagship program Bana Kaih hmangin mi hrang hrang eizawnna bultan duh te tan hmalakna an buatsaih sak a ti a, thalaite chu an eizawnna chauh nilo state leh ram hmasawn nana tha thawh ve turin an duh tih a sawi bawk.

Vawiina hun hmanah hian hmarchhak biala thalai sang khat te thiam thil tih punna tura thawhdunna MoU chu National Skill Development Cooperation leh Welspun Living Limited ten an inthleng tawn a ni.



R NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



EAM

External Affairs Minister Dr.S.Jaishankar chaun vawiin khan The Hague ah Netherlands Prime Minister Dick Schoof a kawm. Pu Jaishankar-a chuan PM Schoof nen an inhmuhnaah hian Prime Minister Narendra Modia aiawha chibai bukin firfiakte laka ngaihdan leh hmalakna khauh tak Netherlands in a nei chu lawmthu a hrilh a. India leh Netherlands te inzawmna ti changtlung zel tura PM Schoof-a hmalaknaah lawmthu sawiin ram pahnih aiawh palaiten theihtawp an chhuah zel dawn tih a sawi a ni.

Kar hmasa khan Netherlands Prime Minister Dick Schoof hian April ni 22-a Pahalgam-a firfiakte chetna na taka a dem thu sawiin firfiaka chetna chu eng ti kawng pawhin a dem thu a sawi a ni.External Affaris Minister hian Netherlands, Denmark leh Germany a tlawhin a thang mek a ni.

<><><>

TIRANGA YATRA

Operation Sindoor neih zawh taka India sipaite huaisenna leh inpekna chawimawi nan Tiranga Yatra neih chhunzawm zel a ni a. Vawiin khan Punjab-a Amritsar ah Tiranga Yatra hi neih niin mi tam tak an tel a. Hnam puanzar feet 100 laia sei ken niin Amritsar bazaar atangin Lahori Gate thleng kawng zawh a ni a. He hunah hian BJP National General Secretary Tarun Chugh chuan a kaihruai a. Thuswiin India sipai huaisen tak takte chungah lawmthu a sawi a ni.

<><><>

TRACHOMA

India chu mitna chi khat Trachoma umbo tawhna ramah WHO chuan a puang. Vawiin khan World Health Assembly vawi 78-na Geneva-a neihah Certificate of Elimination of Trachoma hi World Health Organisation chuan India kutah a hlan a. He mitna hri ti bo tura India hmalakna te, invenna kawnga chak taka hma a lakna leh mitin tana enkawlna tha pe tura hma alakna chawimawi nan he certificate hi hlan a ni a.

Nikum October ni 8 khan WHO chuan Trachoma umbo tawh ramah a puang a. Southeats Asia ram zingah he dinhmun thleng thei pathumna a ni a. Sawrkar laipui chuan National Programme for Control of Blindness and Visual Impairment (NPCBV) hmangin Trachoma umbo tur hian nasa takin hma a la a ni.

<><><>